

समा. 09.20 Hrs

- प्रधानमंत्री नरेन्द्र मोदी होरें आखेया ऐ कि भारत-आसियान व्यापक रणनीति सांझ-भ्याली, कुल संसारी स्थिरता ते विकास लेई इक निगगर मुंड तयार करै करदी ऐ।
- सीमा सुरक्षा बल बी.एस.एफ नै अंतराष्ट्रीय बन्ने पर हासल जिमी दे बदले मुआवजा जारी करियै उत्थू दे लोकें गी बड्डी राहत पुजाई ऐ।
- 4 बरे दे वक्फे दे बाद दरबार मूव दे जम्मू औने गितै तयारियां पूरे जोरें पर, सुरक्षा सनें सबभै बंदोबस्त निगगर।
- 29 अक्तूबर थमां कटड़ा-श्रीनगर भारत एक्सप्रेस रेलगड्डी रियासी रेलवे स्टेशन पर बी रुका करोग।
- सार्वजनिक बंड सरिस्ते च मती पारदर्शिता आहन्ने लेई राशन सप्लाई दा वजन करने दे कम्मै लेई जम्मू-कश्मीर दा पैहला-पैहला डिजिटल कंडा, लेथपोरा च चालू।

<><><><><><>

प्रधानमंत्री नरेन्द्र मोदी होरें आक्खेआ जे 21मीं सदी भारत ते आसियान दी ऐ। मलेशिया च आसियान-भारत शिखर सम्मेलन च वर्चुअल ढंगे कन्नै बोलदे होई उनें इस गल्लै पर जोर दिता जे भारत ते आसियान कुल संसारी आबादी दा तकरीबन चौथा हिस्सा न।

उनें आक्खेआ जे भारत ते आसियान नां छड़ा भूगोल कन्ने जुड़े दे न सगुआं गहरे ऐतिहासिक सरबन्धें ते सांझे मुल्लें राएं बी जुड़े दे न। मोदी होरें गलाया जे अनिश्चित समें च बी भारत-आसियान व्यापक रणनीतिक सांझ-भ्याली नै लगातार तरक्की कीती ऐ। इस मौके पर प्रधानमंत्री होरें आक्खेआ जे.....

<><><><><><>

BSF Compensation

जम्मू-कठुआ ते साम्बा जिलें च अंतराष्ट्रीय बन्नै कन्नै लग्गदे इलाकें च रौहने आहले लोकें गी इक्क बड़ी राहत पुजांदे होई, सीमा सुरक्षाबल BSF नै इलाके च 135 फुट चौड़ा बन्न ते सीमा निगरान चौकियां कायम करने लेई हासल जिमियें दे बदले मुआवजा जारी करी दिता ऐ। एह फैसला केन्द्री गृह मंत्रालय दे दखल दे बाद आया ऐ। प्रधानमंत्री हुंदे दफ्तरै च राज्यमंत्री डाक्टर जितेन्द्र सिंह होरें अपनी इक सोशल मीडिया पोस्ट च जानकारी दिती ऐ जे जम्मू दे डिविजनल कमीशनर रमेश कुमार होरें इस गल्लै दी तस्दीक कीती ऐ कि मुआवजे दी रकम उंदे कश पुज्जी गेदी ऐ ते औंदे किश गै दिनें अंदर सरबन्धित डिप्टी कमीशनरें राएं जिमियें दे अस्सल मालकें गी एह रकम देई दिती जाहगा। इ'स घोषणा दे बाद अंतराष्ट्रीय बन्नै कन्नै लग्गदे इलाकें च रौहने आहले उ'नें सब्भनें लोकें बड़ी राहत मसूस कीती ऐ, जिन्दियां जिमियां इनें कम्में हेठ आई दियां न ते ओ लम्मे अरसे थमां मुआवजें गी बलगा करदे हे।

<><><><><><>

Darbar Move Pre.

चंऊ बरे दे अंतराल मगरा सत्ता दी सीट जम्मू च औहन्ने दी प्रक्रिया परतियै शुरु होई गई ऐ। 2021 च बंद कीते गेदे दरबार मूव गी इस बरे मुखमंत्री उमर अब्दुल्ला हुंदी अगुआई आहली सरकार नै इक बारी फ्ही ब्हाल करी दिता ऐ। अगस्त च रिकार्ड बरखा करी क्षतिग्रस्त होई गेदियां जम्मू शैहरें दियें केई सिडकें दी मरम्मत दे कम्म नै बी दरबार इत्थे आहने कोला पैहले रफ्तार फड़ी लैती ऐ।

मजदूर सिङ्कें दी सफाई ते सिङ्कें दे कंडे गी रंगने च मसरुफ न। सिविल सचिवालय, राजभवन ते होरनें महत्वपूर्ण सुविधायें ते कर्मचारियें दे आवासें दे आले-दोआले सुरक्षा बंदोबस्त बधाए गे न। पूरे शैहरें च ते 270 किलोमीटर लम्मी जम्मू-श्रीनगर जरनैली सिङ्क पर पुलस ते नीम फौजी बलें गी मते बड्डे पैमाने पर तैनात कीता गया ऐ।

<><><><><><>

By Polls Prep

जम्मू-कश्मीर दे नगरोंटा ते बडगाम विधानसभा हलके औंदे उपचुना लेई तयार न ते उत्थै चुना सरबंधि तयारियां जोरे-शोरें जारी न। पूरी चाल्ली सुतंत्र, साफ-सुथरे ते पारदर्शी चुना यकीनी बनाने लेई प्रशासन नै, 11 नवम्बर गी होने आहले मतदान ते 14 नवम्बर गी वोटें दी गिनतरी लेई सुरक्षा सनें होर दुए सब्बै बंदोबस्त करी लैते देन। इस सिलसिले च मुख चुनां अधिकारी संजीव वर्मा होरें सरबंधित जिला चुनां अधिकारियें कन्नै किश दिन पैहले इक बैठक दी अध्यक्षता कीती ते तयारियें दे बक्ख-बक्ख पैहलुएं दा जायजा लैता।

तांआई बडगाम विधानसभा हलके लेई वोटिंग मशीनें दी बिच्चा-बिच्चा ताल करियै बक्ख-बक्ख मतदान केन्द्रें लेई भेजने सरबंधि रैंडमाइजेशन दा कम्म कल कीता गया। जिला चुना अफसर डाक्टर बिलाल भट्ट हुंदी दिक्ख-रिक्ख च इस कम्मै गी पूरी चाली पारदर्शी ढंगै नै तोड़ चाढेया गया।

<><><><><><>

CSIR Buyer Seller Meet

सी.एस.आई.आर (ट्रिपल आई.एम) जम्मू ते औशधी बूहटे आहले राश्ट्री बोर्ड- आयुष मंत्रालय नै सी.एस.आई.आर (ट्रिपल आई.एम), श्रीनगर च औशधी ते खुशबूदार बूहटें दे खेत्तर पर केन्द्रित इक रोजा क्रेता-विक्रेता बैठक दा आयोजन कीता।

इस कार्यक्रम च पूरे कश्मीर थमां आए दे 100 शा मते करसानें ते भारत दे बक्ख-बक्ख हिस्सें थमां खरीददारें हिस्सा लैता सी.एस.आई.आर- ट्रिपल आई.एम दे निदेशक डाक्टर जबीर अहमद होरें इस सैक्टर च दोआइयें दी खोज ते करसानें गी आमदनी दे मौके उपलब्ध करोआने दी समर्थ पर जोर पाया। इस कार्यक्रम दा मकसद उत्पादकें, उद्यमियें ते सरकारी ते गैर-सरकारी संगठन बश्कार सहयोग गी बढावा दिंदे होई मुल्ल संवर्धन ते बजार पुज्ज च चुनौतियें दा सामना करना ऐ तां जे जड़ी-बूटियें दे उत्पादें दी गुणवत्ता गी बधाया जाई सकै ते कुल संसारी बजार दियें संभावनाएं दा विस्तार कीता जाई सकै।

<><><><><><>

Reasi Halt

श्रीनगर ते कटड़ा बश्कार चलने आहली वंदे भारत रेलगड्डी दे रुट च इक होर स्टॉप बनाने दी घोषणा दे बाद यात्रियें अंदर मता उत्साह ते राहत दिक्खने गी लब्बै करदी ऐ, टकोहदा करियौ ओ जिनेंगी हून रियासी रेलवे स्टेशन परा बी एह गड्डी फड़ने दा मौका थहोग। जियां जे पैहले बी खबर दिती जाई चुकी दी ऐ कि गड्डी नम्बर 26401-26402 कटड़ा थमां श्रीनगर ते श्रीनगर थमां कटड़ा औंदे बाकी हून 29 अक्तूबर रियासी स्टेशन पर बी दंडु मिंटे लेई रुका करग। रेलवे दे सीनियर डिविजन कमर्शियल मैनेजर उचित सिंघल होरें दसेया ऐ जे एह फैसला टकोहदा करियै श्री माता वैष्णो देवी जी दे दर्शन लेई औने आहले श्रद्धालुएं ते चिनाह पुल बक्खी जाने दे इच्छुक सैलानियें दी बधदी मंग गी ध्यानै च रखदे होई लैता गया ऐ। इस फैसले दी सराहना करदे होई कैंई मकामी लोकें इस फैसले पर अपने विचार आकाशवाणी समाचार कन्नै सांझे कीते न.....

<><><><><><>

Digital Weightbridge

सार्वजनिक बंड बिक्री दे कम्मै च पूरी पारदर्शिता ते कुशलता आहन्ने दे मकसद कन्नै खुराक, सिविल सप्लाय ते उपभोक्ता मामले सरबन्धी मैहकमे नै कल लेथपोरा च राशन दा वजन करने लेई पैहले-पैहले डिजिटल कंडे दी

शुरुआत कीती ऐ। इस सुविधा दा उदघाटन मंत्री सतीश शर्मा होरें विधायक हसनैन मसूदी ते होरनें सीनियर अफसरें दी मजूदगी च कीता।

इस मौके मंत्री होरें अपने सम्बोधनै च आखेया जे इस पैहल कन्नै अन्नदानें दी खुश-खरीद कोला लेइयै एहदी सप्लाई दे कम्मै च वजन दी स्टीकता जकीनी बनाग, चोरी, हेराफेरी दी गुंजैश भलेयां नेंई रौहग ते सारा कम्म पूरी चाल्ली पारदर्शता आहले ढंगै सिर कीता जाई सकोग। एह शुरुआत पूरे केन्द्र शासत प्रदेश च होरनें थाहरें बी इस्सा चाल्ली दे डिजिटल कंडे लाने लेई इक आदर्श नमूने दा कम्म करोग ते मैहकमे दा सारे कम्मै च पारदर्शता ते जवाबदेही जकीनी बनग।

<><><><><><>

GST

माल-सम्यान ते सेवाएं सरबंधि टैक्स जी.एस.टी. दियें दरें च कीती गेदी कटोती दा लाह जम्मू-कश्मीर दे लोकें गी बी बड्डै पैमाने पर पुज्जना शुरु होई गेदा ऐ। दस्तकारी, राई-बाई ते सैलसफा दे क्षेत्र जिंदी जम्मू-कश्मीर दी अर्थबवस्था च महत्वपूर्ण भूमका ऐ, उंदे च जी.एस.टी. 12 प्रतिशत कोला घटाइयै 5 प्रतिशत करने कन्नै इनें क्षेत्रें कन्नै जुडे दे लोकें गी बड़ा फैयदा पुज्जा रदा ऐ। इस कारवाई कन्नै तौले गै कम्म-रोजगार दे मौके पैदा होने, प्रतिस्पर्धा बधने ते कारीगिरें ते करसानें गी बी राहत हासल होने दी मेद ऐ। पश्मीना शाल, कलीन, बसोहली चित्रकारी, विल्लो दी लक्कड़ कन्नै बुनियै त्यार कीता गेदा सम्यान ते होर केंई सारी चीजें दी मंग ते बिकरी बधने दी मेद ऐ। इस्सै चाली होटलें पर जी.एस.टी कटौती कन्नै सैलसफा गी फैयदा पुज्जा करदा ऐ मते सैलानी होटलें च जाना ते रौहना पसंद करा करदे न.....

<><><><><><>